

**LJEKARSKA KOMORA
ZENIČKO – DOBOJSKOG KANTONA**

S T A T U T
(prečišćeni tekst)

Zenica, 20. oktobar 2014. godine

Na osnovu člana 223. stav 1. Zakona o zdravstvenoj zaštiti (Sl.novine FBiH broj 46/10 i 75/13) Skupština Ljekarske komore Zeničko – dobojskog kantona na svojoj redovnoj sjednici održanoj dana 02.10.2014. godine usvojila je

STATUT LJEKARSKE KOMORE ZENIČKO - DOBOJSKOG KANTONA

I OSNOVNE ODREDBE

Član 1 .

Ovim Statutom uređuju se: naziv i sjedište, ciljevi i djelatnosti, zastupanje i predstavljanje, organi, nadležnosti i ovlasti, način izbora, imenovanja i opoziva, trajanje mandata, kvorum i pravila glasanja, oblik i sadržaj pečata, oblik i sadržaj znaka, časopis, sticanje i raspolaganje imovinom, način finansiranja i došenja finansijskog i izvještaja o radu, postupak za donošenje, izmjene ili dopune Statuta i drugih općih akata, uvjeti i način učlanjenja, prestanak članstva, prava, dužnosti i odgovornosti članova, sadržaj, način i rokovi stručnog usavršavanja članova, postupak izdavanja, obnavljanja i oduzimanja licence, uslove pod kojima se razmatra obnavljanje odobrenja, način vođenja registra licenciranih članova, granice, način i druga pitanja u vezi sa ostvarivanjem javnih ovlaštenja, kao i način obavljanja drugih poslova utvrđenih Zakonom te ostala pitanja od značaja za rad Ljekarske komore Zeničko – dobojskog kantona.

II NAZIV, SJEDIŠTE I PODRUČJE DJELOVANJA

Član 2.

Naziv Komore je: "Ljekarska Komora Zeničko - dobojskog kantona" (u daljem tekstu: Komora).

Član 3.

Sjedište Komore je u Zenici, Bulevar kralja Tvrtka I, broj 4/2.

Član 4.

Komora djeluje na području Zeničko - dobojskog kantona (u daljem tekstu: Ze-do kantona).

Član 5.

Komora je samostalno i neovisno strukovno udruženje doktora medicine i doktora stomatologije (u daljem tekstu: ljekara) koji djelatnost svoje struke obavljaju na području Ze-do kantona.

Član 6.

Komora ima svojstvo pravnog lica i upisana je u registar kod nadležnog Suda u Zenici.

Član 7.

Komora može osnivati privredne i druge subjekte u skladu sa Zakonom i ovim Statutom.

III PEČAT, ZNAK I ČASOPIS

Član 8.

Komora ima pečat prečnika 4 cm sa ispisanim tekstom: „Ljekarska komora Zeničko-dobojskog kantona Zenica”.

U sredini pečata je znak Komore.

O načinu upotrebe pečata odluku donosi Izvršni odbor Komore.

Komora ima svoj znak koji čini Eskulapov štap i zmija.

Član 9.

Komora je izdavač časopisa „Medicinski glasnik“ i nosilac srodnog prava na koji ima moralna i imovinska prava i koji je upisan u knjigu evidencije autorskih djela koju vodi Institut za intelektualnu svojinu/vlasništvo BiH.

IV CILJEVI I DJELATNOSTI

Član 10.

Ciljevi Komore su:

- Očuvanje i zaštita interesa ljekarske profesije;
- Zadovoljavanje stručnih i ličnih potreba ljekara;
- Osiguranje uvjeta za organiziran nastup ljekara prema državnim organima, udruženjima, zdravstvenim ustanovama, proizvođačima i dobavljačima lijekova, medicinskih sredstava i opreme;
- Zaštita zdravlja građana.

Član 11.

Komora štiti i zastupa interese ljekarske profesije, brine o pravilnom ponašanju i ugledu ljekara i ljekarske struke, s tim da ispunjava slijedeće zadatke:

- vodi registar svojih članova, na način utvrđen Pravilnikom o registru članova Komore;
- donosi Kodeks medicinske etike i deontologije, prati i nadzire njegovo provođenje te preduzima odgovarajuće mjere u slučaju njegovog kršenja;
- daje mišljenje kantonalnom ministru o opravdanosti izdavanja, produženja ili oduzimanja odobrenja za obavljanje poslova privatne prakse, te početka, proširenja, promjene i prestanka rada zdravstvenih ustanova sa pozicije i očuvanja profesije koju zastupa;
- certifikuje članove Komore za upravljanje novim zdravstvenim tehnologijama, na osnovu načina i uslova za upravljanje novim zdravstvenim tehnologijama koje utvrđuje federalna komora;
- utvrđuje maksimalnu cijenu zdravstvenih usluga za privatnu praksu koja ne ostvaruje prihode putem zavoda osiguranja kantona i ovjerava cjenovnik zdravstvenih usluga privatne prakse;

- daje mišljenje na cijene zdravstvenih usluga iz dobrovoljnog zdravstvenog osiguranja;
- zastupa interese svojih članova kod sklapanja ugovora sa Zavodom zdravstvenog osiguranja Ze-do kantona i drugim osiguravajućim zavodima;
- obezbjeđuje zaštitu građanima u ostvarivanju prava s obzirom na kvalitet, sadržaj i vrstu zdravstvene usluge koja im se pruža;
- po službenoj dužnosti izdaje, obnavlja i oduzima licence svojim članovima na osnovu zajedničkih kriterija Ljekarske/Liječničke komore FBiH i u skladu sa Pravilnikom o licenciranju članova Komore;
- učestvuje pri utvrđivanju standarda i normativa zdravstvenih usluga;
- daje stručna mišljenja kod pripreme propisa koji su od uticaja na razvoj zdravstvene struke;
- organizuje dodatno usavršavanje za proširenje djelatnosti unutar struke s obzirom na nove dijagnostičko-terapijske metode;
- propisuje način oglašavanja i način isticanja naziva privatne prakse te utvrđuje slučajeve koji se ne smatraju reklamiranjem zdravstvenih usluga;
- daje saglasnost za zdravstvenu ustanovu i privatnu praksu, odnosno saglasnost za zdravstvenog radnika za obavljanje metoda i postupaka alternativne medicine;
- obavlja i druge poslove određene Zakonom o zdravstvenoj zaštiti, Zakonom o liječništvu i Statutom.

V ČLANSTVO

Član 12.

Ljekari koji rade na području Ze-do kantona, nakon položenog stručnog ispita, obavezno se upisuju u registar ljekara Komore, čime stiču pravo na izdavanje licence.

Izuzetno od stava 1. ovog člana, članstvo u Komori je dobrovoljno za ljekare koji:

- ljekarsku djelatnost ne obavljaju neposredno,
- ljekarsku djelatnost obavljaju izvan Ze-do kantona,
- su nezaposleni,
- su u penziji.

Član 13.

Član Komore postaje se podnošenjem pismenog zahtjeva za upis u registar članova Komore. Uz zahtjev, iz stava 1. ovog člana, ljekar je dužan dostaviti dokumentaciju bliže određenu Pravilnikom o licenciranju i Pravilnikom o registru Komore (u daljem tekstu: Pravilnik Komore), nakon čega Komora provodi postupak utvrđen Pravilnikom.

Član 14.

Članstvo u Komori prestaje:

- smrću;
- prestankom obavljanja poslova ljekara;
- neplaćanjem članarine, tri (3) mjeseca uzastopno, osim u slučajevima predviđenim ovim Statutom;
- oduzimanjem odobrenja za samostalan rad;
- prestankom obavljanja poslova ljekara na području Ze-do kantona;

- na zahtjev člana Komore.

Članstvo, iz stava 1. alineja 3. ovog člana, prestaje, ukoliko član, nakon opomene ne obrazloži, u pismenoj formi, objektivne razloge neplaćanja članarine, i to:

- porodijsko odsustvo;
- nezaposlenost;
- bolovanje duže od 42 dana.

Nakon prestanka članstva u Komori, predsjednik Komore donosi rješenje o ispisu (brisanju) iz registra Komore i oduzimanju licence u skladu sa Pravilnikom Komore.

Član 15.

Prava članova Komore su:

- prava na usluge Komore, koje proizilaze iz člana 11. Statuta;
- pasivno i aktivno pravo glasa, pravo sudjelovanja u svim organima Komore;
- učešće na seminarima i drugim oblicima stručnog usavršavanja, koje organizuje Komora;
- pravo na besplatnu objavu radova u časopisima Komore;
- pravo na stalno stručno savjetovanje i pravovremenu informisanost.

Član 16.

Dužnosti članova Komore su:

- poštivanje svih odluka i akata Komore;
- pravovremeno obavještanje Komore o svim podacima, u skladu sa Pravilnikom Komore;
- redovno plaćanje članarine, osim u slučajevima predviđenim ovim Statutom.

VI POSTUPAK IZDAVANJA, OBNAVLJANJA I ODUZIMANJA LICENCE

Član 17.

Licenca je javna isprava kojom ljekar – član Komore stiče pravo da samostalno obavlja poslove u struci i u okviru stručnog naziva određenog licencom.

Licenca se izdaje kao redovna i privremena.

Redovna licenca se izdaje na period od šest (6) godina.

Privremena licenca se izdaje na period kraći od šest (6) godina.

Članu Komore može se izdati licenca, u skladu sa zakonom do navršene 65. godine života.

Licenca se može produžavati, za period od jedne godine, a najduže do navršenih 75. godina života, uz uslov:

da je član Komore zdravstveno sposoban za obavljanje poslova svoje struke i da redovno plaća članarinu.

Postupak izdavanja, obnavljanja i oduzimanja licence ljekarima – članovima Komore bliže uređuje Pravilnik o licenciranju i Pravilnik o odgovornosti Komore.

VII SADRŽAJ, NAČIN I ROKOVI STRUČNOG USAVRŠAVANJA ČLANOVA

Član 18.

Ljekari imaju pravo i obavezu kontinuiranog i trajnog stručnog usavršavanja.

Kontinuirano i trajno stručno usavršavanje, iz stava 1. ovog člana, obavlja se putem različitih oblika stručnog usavršavanja, sa ciljem poboljšanja kvaliteta zdravstvenih usluga koje ljekari pružaju u okviru svog stručnog naziva.

Komora donosi Plan stručnog usavršavanja članova za svaku kalendarsku godinu.

Sadržaj, način te rokove stručnog usavršavanja ljekara – članova Komore bliže uređuje Pravilnik o stručnom usavršavanju.

VIII ORGANI, NADLEŽNOSTI I OVLAŠTI

Član 19.

Organi Komore su:

- 1) Skupština,
- 2) Izvršni odbor,
- 3) Predsjednik i zamjenik predsjednika,
- 4) Sud Komore,
- 5) Tužitelj Komore,
- 6) Nadzorni odbor,
- 7) Općinsko povjereništvo,
- 8) Generalni sekretar,
- 9) Komisije Komore.

Član 20.

Prilikom delegiranja u organe Komore, poštuje se princip ravnomjerne zastupljenosti ljekara svih profila (ljekari iz primarne i bolničke zdravstvene zaštite, ljekari svih specijalizacija, odnosno subspecijalizacija, ljekari iz društvene i privatne prakse i sl.).

Član 21.

Ukoliko delegatu Skupštine, odnosno članu Izvršnog odbora, Suda, Tužitelja, Nadzornog odbora, Općinskog povjereništva ili Komisije Komore, u skladu sa članom 13. Statuta Komore, prestane članstvo u Komori, njegova Izborna jedinica imenuje novog delegata, odnosno člana organa Komore.

Član 22.

Mandat delegata Skupštine, članova drugih organa i Komisija Komore je četiri (4) godine.

Isti članovi Komore mogu biti ponovo birani za delegate Skupštine, članove drugih organa i Komisija Komore.

U jednom mandatu, delegat Skupštine Komore ne može ujedno biti član Izvršnog ili Nadzornog odbora Komore.

Iznimno, od stava 1. ovog člana, u slučajevima kada delegati Skupštine, članovi organa ili komisija Komore, prestanu obavljati poslove doktora medicine ili stomatologije u zdravstvenim ustanovama koje zastupaju u organima Komore, kada napuste prebivalište na području Kantona ili kada neopravdano ne dolaze na sjednice organa Komore, mogu biti razriješeni dužnosti i za vrijeme trajanja mandata, o čemu odluku donosi Skupština, odnosno Izvršni odbor.

U slučajevima iz prethodnog stava, na mandatni period do isteka mandata Skupštine, organa ili Komisije Komore, imenuje se novi delegat Skupštine, član organa ili Komisije Komore.

1) SKUPŠTINA

Član 23.

Skupština je najviši organ upravljanja Komore.

U javnim zdravstvenim ustanovama, na području Kantona, na svakih petnaest (15) ljekara bira se jedan (1) delegat.

Ukoliko zdravstvena ustanova ima do petnaest (15) ljekara, ima pravo izabrati jednog delegata.

Privatne zdravstvene ustanove, sa područja Kantona, biraju ukupno šest (6) delegata.

U javnim zdravstvenim ustanovama, delegate predlažu: - stručni kolegij ili povjerenici po općinama, o čemu Odluku donosi Izvršni odbor.

U privatnim zdravstvenim ustanovama, delegate predlaže povjerenik za PZU, o čemu Odluku donosi Izvršni odbor.

Predloženi delegati obavezno potpisuju izjave da prihvataju dužnost delegata, odnosno člana odgovarajuće Komisije ili drugog tijela Komore.

Nakon prijedloga iz zdravstvenih ustanova, u pismenoj formi i potpisa izjava, konačan broj delegata utvrđuje Izvršni odbor.

Mandat članova Skupštine (delegata) traje četiri (4) godine s mogućnošću ponovnog izbora.

Član 24.

Skupština se saziva najmanje jedanput godišnje, a saziva je predsjednik Komore pismenim putem.

Poziv za Skupštinu, uz prijedlog dnevnog reda, mora se dostaviti delegatima najmanje deset (10) dana prije održavanja sjednice Skupštine.

Zahtjev za sazivanje vanredne sjednice Skupštine, predsjedniku Komore, mogu podnijeti Izvršni odbor, najmanje tri (3) Općinska povjereništva ili najmanje jedna trećina (1/3) delegata Skupštine.

Predsjednik Komore mora sazvati vanrednu sjednicu Skupštine najkasnije u roku od 30 dana po prijemu zahtjeva iz prethodnog stava.

Ukoliko sjednicu Skupštine ne sazove u roku iz prethodnog stava, predlagatelji mogu sami sazvati vanrednu sjednicu Skupštine.

Član 25.

Skupština Komore obavlja slijedeće poslove:

1. Donosi Statut Komore,
2. Donosi Kodeks medicinske etike i deontologije,
3. Donosi Pravilnik o odgovornosti članova Komore,
4. Donosi Pravilnik o finansijskom poslovanju Komore,
5. Donosi Poslovnik o radu Skupštine, Tužitelja i Suda Komore te Nadzornog odbora,
6. Razmatra i usvaja Izvještaj o radu i Izvještaj o finansijskom poslovanju Komore,
7. Razmatra i usvaja Plan i program rada i Finansijski plan Komore,
8. Donosi odluku o visini upisnine i članarine Komore,
9. Donosi odluku o sjedištu Komore,

10. Bira i razrješava predsjednika i zamjenika predsjednika Komore,
11. Bira i razrješava predsjednika, zamjenika predsjednika i članove Izvršnog odbora Komore,
12. Bira i razrješava predsjednika, zamjenika predsjednika i članove Nadzornog odbora Komore,
13. Bira i razrješava predsjednika, zamjenika predsjednika i članove Suda Komore,
14. Bira i razrješava Tužitelja i tri zamjenika Tužitelja Komore,
15. Odlučuje o povezivanju i saradnji Komore sa drugim srodnim udruženjima i organizacijama,
16. Donosi i druge odluke u skladu sa ovim Statutom i drugim aktima Komore.

Član 26.

Skupština ima kvorum ako je prisutna nadpolovična većina (50% + 1) ukupnog broja izabranih delegata Skupštine.

Odluka Skupštine je punovažna ako je za nju glasala nadpolovična većina (50% + 1) ukupnog broja prisutnih delegata na sjednici Skupštine koja ima kvorum.

Član 27.

Način sazivanja sjednica Skupštine, način raspravljanja, odlučivanja i glasanja te druga pitanja od značaja za rad Skupštine uređuju se Poslovníkom o radu Skupštine.

2) IZVRŠNI ODBOR

Član 28.

Izvršni odbor čine predsjednik, zamjenik predsjednika i deset (10) članova, od kojih jedan (1) član mora biti iz privatne zdravstvene ustanove, a jedan član Izvršnog odbora mora biti doktor stomatologije.

Članovi Izvršnog odbora ujedno su i predsjednici Opštinskih povjereništava.

Prilikom izbora članova Izvršnog odbora, pored uslova iz člana 20. Statuta, poštuje se i princip teritorijalne zastupljenosti, tako da:

- zdravstvene ustanove koje obavljaju zdravstvenu djelatnost na području opštine Tešanj, daju dva (2) člana Izvršnog odbora,
- zdravstvene ustanove koje obavljaju zdravstvenu djelatnost na području opština Maglaj, Zavidovići i Žepče, daju dva (2) člana Izvršnog odbora,
- Kantonalna bolnica Zenica daje tri (3) člana Izvršnog odbora, a ostale zdravstvene ustanove koje obavljaju zdravstvenu djelatnost na području opštine Zenica, daju jednog (1) člana Izvršnog odbora,
- zdravstvene ustanove koje obavljaju zdravstvenu djelatnost na području opštine Kakanj, daju jednog (1) člana Izvršnog odbora,
- zdravstvene ustanove koje obavljaju zdravstvenu djelatnost na području opštine Visoko, daju jednog (1) člana Izvršnog odbora,
- zdravstvene ustanove koje obavljaju zdravstvenu djelatnost na području opština Breza, Vareš i Olovo, daju jednog (1) člana Izvršnog odbora,
- zdravstvene ustanove koje obavljaju zdravstvenu djelatnost u privatnom sektoru, daju jednog (1) člana Izvršnog odbora.

Izvršni odbor bira Skupština iz reda članova Komore, na način iz prethodnog stava.

Člana Izvršnog odbora, iz reda ljekara zaposlenih u privatnim zdravstvenim ustanovama, Skupštini predlaže Komisija za privatnu praksu, a člana Izvršnog odbora iz oblasti stomatološke djelatnosti predlažu općinska povjereništva.

Kandidat koji dobije najveći broj glasova izabran je za člana Izvršnog odbora.

Mandat članova Izvršnog odbora traje četiri (4) godine s mogućnošću ponovnog izbora.

Član 29.

Članove Izvršnog odbora, odnosno predsjednike Opštinskih povjereništava, Skupštini predlažu Stručni kolegij ili povjerenici po općinama, u javnim zdravstvenim ustanovama i povjerenik za PZU, u privatnim zdravstvenim ustanovama, odnosno Komisija za privatnu praksu.

Predloženi članovi obavezno potpisuju izjave da prihvataju dužnost člana Izvršnog odbora, odnosno predsjednika Opštinskog povjereništva.

Član 30.

Izvršni odbor obavlja slijedeće poslove:

1. Donosi sve Pravilnike Komore, osim Pravilnika iz člana 25. Statuta,
2. Donosi Poslovnike o radu organa i tijela Komore, osim Poslovnika o radu Skupštine, Tužitelja, Suda i Nadzornog odbora Komore,
3. Bira i razrješava predsjednike i članove Komisija,
4. Izvršava odluke i zaključke Skupštine,
5. Razmatra inicijative za donošenje i za izmjene i dopune općih akata Komore i odlučuje o istim te utvrđuje nacрте i prijedloge općih akata Komore,
6. Priprema materijale, informacije, analize i sl. za Skupštinu,
7. Donosi odluku o izboru generalnog sekretara Komore, a na temelju provedenog konkursa,
8. Utvrđuje blagajnički maksimum,
9. Utvrđuje cjenovnik usluga Komore,
10. Daje saglasnost za priznanje naziva primarijus,
11. Podnosi godišnji izvještaj Skupštini,
12. Odlučuje o žalbama na odluke predsjednika Komore,
13. Sarađuje sa Federalnim i Kantonalnim Ministarstvom zdravlja u obavljanju poslova i zadataka Komore u skladu sa zakonskim propisima, ovim Statutom i drugim općim aktima Komore,
14. Sarađuje sa Federalnim i Kantonalnim Zavodom zdravstvenog osiguranja i drugim osiguravajućim društvima,
15. Zastupa interese članova Komore kod sklapanja ugovora sa Federalnim Zavodom zdravstvenog osiguranja, odnosno Kantonalnim Zavodom zdravstvenog osiguranja i drugim osiguravajućim zavodima,
16. Daje mišljenje na cijenu zdravstvenih usluga za privatnu praksu koja ne ostvaruje prihode putem Kantonalnog Zavoda,
17. Sarađuje sa direktorima zdravstvenih ustanova u cilju što uspješnijeg obavljanja poslova i zadataka iz nadležnosti Komore,
18. Sarađuje sa odgovarajućim udruženjima i ustanovama u državi BiH i inostranstvu,
19. Obavlja i druge poslove utvrđene ovim Statutom i drugim općim aktima Komore.

Član 31.

Sjednice Izvršnog odbora saziva predsjednik ili zamjenik predsjednika Izvršnog odbora i iste se održavaju u pravilu jednom mjesečno.

Izvršni odbor ima kvorum ako je prisutna nadpolovična većina (50% + 1) ukupnog broja članova Izvršnog odbora.

Odluka Izvršnog odbora je punovažna ako je za nju glasala nadpolovična većina (50% + 1) ukupnog broja prisutnih članova na sjednici Izvršnog odbora koja ima kvorum.

Pitanja od značaja za rad Izvršnog odbora uređuju se Poslovnikom o radu Izvršnog odbora.

3) PREDSJEDNIK I ZAMJENIK PREDSJEDNIKA KOMORE

Član 32.

Predsjednika i zamjenika predsjednika Komore bira i razrješava Skupština Komore.

Kandidat za predsjednika i zamjenika predsjednika Komore može biti svaki član Komore koji ispunjava kriterije i ako mu kandidaturu podrži Izvršni odbor Komore ili ako ima 30 potpisa članova Komore.

Član 33.

Odluku o izboru predsjednika i zamjenika predsjednika Komore Skupština donosi nadpolovičnom većinom (50% + 1) ukupnog broja prisutnih delegata na sjednici Skupštine koja ima kvorum.

Ako u prvom krugu, nijedan kandidat ne dobije većinu iz stava 1. ovog člana, prelazi se u drugi krug izbora između dva kandidata koja su u prvom krugu dobila najviše glasova.

U tom slučaju, za predsjednika Komore izabran je kandidat koji je dobio više glasova. Slijedeći kandidat po broju dobivenih glasova je izabran za zamjenika predsjednika Komore.

Član 34.

Mandat predsjednika i zamjenika predsjednika Komore je četiri (4) godine uz mogućnost ponovnog izbora.

Član 35.

Predsjednik Komore obavlja slijedeće poslove:

1. Zastupa i predstavlja Komoru,
2. Saziva i predsjedava sjednicama Skupštine,
3. Izvršava odluke i zaključke Skupštine,
4. Učestvuje u radu Izvršnog odbora, te provodi njihove odluke i zaključke,
5. Donosi rješenje o upisu u Registar i izdavanju odobrenja sa samostalan rad ili rješenje kojim se zahtjev odbija,
6. Donosi rješenje o oduzimanju odobrenja za samostalan rad,
7. Obavlja i druge poslove utvrđene ovim Statutom i drugim općim aktima Komore te one koje mu povjeri Skupština Komore.

Član 36.

Zamjenik predsjednika Komore mijenja predsjednika Komore u slučaju njegove odsutnosti ili spriječenosti.

Zamjenik predsjednika Komore obavlja i druge poslove utvrđene ovim Statutom i drugim općim aktima Komore te poslove koje mu povjeri predsjednik Komore.

Član 37.

U slučaju da predsjednik Komore ne može obavljati funkciju, obavljat će je zamjenik predsjednika, najduže do slijedeće redovne sjednice Skupštine.

Član 38.

Predsjednik Komore je dužan podnijeti Izvještaj o radu Skupštini Komore. Za svoj rad, predsjednik i zamjenik predsjednika Komore, odgovaraju Skupštini Komore.

Član 39.

Predsjednik i zamjenik predsjednika Komore mogu biti razriješeni dužnosti i prije isteka mandata u skladu sa odredbama ovog Statuta i odredbama drugih općih akata Komore.

4) SUD KOMORE

Član 40.

Sud Komore razmatra i donosi odluke o povredama dužnosti i ugleda ljekarske struke.

Član 41.

Sud Komore čine predsjednik, zamjenik predsjednika i deset (10) članova Suda. U slučaju da predsjednik Suda Komore ne može vršiti funkciju, obavljat će je zamjenik sa svim ovlastima predsjednika. Članove Suda bira Skupština iz reda članova Komore. Mandat Suda Komore traje četiri (4) godine s mogućnošću ponovnog izbora.

Član 42.

Članove Suda Skupštini predlažu stručni kolegij ili povjerenici po općinama, u javnim zdravstvenim ustanovama i povjerenik za PZU, u privatnim zdravstvenim ustanovama. Predloženi članovi obavezno potpisuju izjave da prihvataju dužnost člana Suda Komore.

4.1) IMENOVANJE SUDA KOMORE

Član 43.

Za razmatranje pojedinačnih postupaka, predsjednik Suda imenuje Vijeće od pet (5) članova, uključujući i predsjednika Suda. Vijeće Suda radi u sjednicama kojima prisustvuju svi imenovani članovi Vijeća. Odluka Vijeća Suda je punovažna ako je za nju glasala nadpolovična većina (50% + 1) ukupnog broja imenovanih članova Vijeća. Žalbe na odluke Suda Komore razmatra Sud Komore Ljekarske/Liječničke komore FBiH. Rad Suda Komore odvija se u skladu sa odredbama Pravilnika o odgovornosti članova Komore i Poslovnika o radu Suda Komore.

Član 44.

Sud Komore podnosi Izvještaj o radu Skupštini Komore.

5) TUŽITELJ KOMORE

Član 45.

Tužitelja Komore čine Tužitelj i tri zamjenika Tužitelja.
Tužitelja i zamjenike Tužitelja Komore, iz reda članova, bira Skupština Komore.
Mandat Tužitelja Komore traje četiri (4) godine s mogućnošću ponovnog izbora.

Član 46.

Tužitelja Komore predlažu stručni kolegij ili povjerenici po općinama, u javnim zdravstvenim ustanovama i povjerenik za PZU, u privatnim zdravstvenim ustanovama.
Predloženi članovi obavezno potpisuju izjave da prihvataju dužnost Tužitelja Komore.

Član 47.

Tužitelj Komore zahtjevom pokreće postupak za utvrđivanje povreda dužnosti i ugleda ljebarske struke.
Postupak iz stava 1. ovog člana pokreće se pred Sudom Komore.
Rad Tužitelja Komore odvija se u skladu sa odredbama Pravilnika o odgovornosti članova Komore i Poslovnika o radu Tužitelja Komore.

6) NADZORNI ODBOR

Član 48.

Nadzorni odbor čine predsjednik, zamjenik predsjednika, dva (2) člana i dva (2) zamjenika člana Nadzornog odbora.
Rad Nadzornog odbora odvija se u vijećima koje čine tri (3) člana.
Vijeće Nadzornog odbora ima kvorum ukoliko su prisutna dva (2) člana.
Nadzorni odbor bira Skupština iz reda članova Komore.
Mandat članova Nadzornog odbora traje četiri (4) godine s mogućnošću ponovnog izbora.

Član 49.

Članove Nadzornog odbora Skupštini predlažu stručni kolegiji ili povjerenici po općinama, u javnim zdravstvenim ustanovama i povjerenik za PZU, u privatnim zdravstvenim ustanovama.
Predloženi članovi obavezno potpisuju izjave da prihvataju dužnost člana Nadzornog odbora.

Član 50.

Nadzorni odbor vrši kontrolu provođenja odredaba Statuta, odluka Skupštine i drugih organa Komore te kontrolu finansijsko-materijalnog poslovanja Komore.
Nadzorni odbor podnosi godišnji izvještaj o svom radu Skupštini Komore.

Član 51.

Rad Nadzornog odbora odvija se u skladu sa odredbama Poslovnika o radu Nadzornog odbora Komore.

7) OPĆINSKA POVJERENIŠTVA

Član 52.

Općinska povjereništa osnivaju se u svakoj općini Ze-do kantona.

Općinska povjereništa čine: predsjednik, zamjenik predsjednika i 1-20 članova, što se utvrđuje odlukom Izvršnog odbora Komore.

Mandat članova Općinskog povjereništa traje četiri (4) godine s mogućnošću ponovnog izbora.

Član 53.

Predsjednik Općinskog povjereništa je ujedno i član Izvršnog odbora Komore.

Izvršni odbor bira predsjednike Općinskih povjereništa općina čiji predstavnici nisu izabrani za članove Izvršnog odbora, na prvoj konstituirajućoj sjednici.

Izbor, iz prethodnog stava, vrši se sa lista kandidata, dostavljenih Skupštini, kao prijedlozi za članove Izvršnog odbora.

Predsjednik Općinskog povjereništa predstavlja Općinsko povjereništvo kod organa Komore, saziva i predsjedava sjednicama Općinskog povjereništa, prima odluke, obavijesti i upute od Skupštine, Izvršnog odbora i predsjednika Komore i prati njihovo provođenje.

Općinsko povjereništvo sastaje se prema potrebi.

Općinsko povjereništvo odluke donosi većinom glasova ukupnog broja članova.

Član 54.

Općinsko povjereništvo obavlja slijedeće poslove::

- Provodi odluke i zaključke organa Komore,
- Sudjeluje u planiranju zdravstvene zaštite u svojoj općini,
- Provodi mirovni postupak u slučaju sporova između članova Komore u općini,
- Učestvuje u organiziranju stručnih usavršavanja svojih članova u općini sa odgovarajućim organima i Komisijama Komore,
- Razmatra primjedbe i prijedloge svojih članova i po potrebi ih prosljeđuje nadležnim organima i Komisijama Komore,
- Vodi pomoćni registar članova Komore u općini,
- Obavlja i druge poslove utvrđene ovim Statutom i drugim općim aktima Komore.

8) GENERALNI SEKRETAR

Član 55.

Generalni sekretar Komore surađuje sa predsjednikom Komore u pripremi sjednica Skupštine i Izvršnog odbora Komore, kao i u drugim poslovima u radu Komore.

Odgovoran je za zapisnike, odluke i izvještaje sa sjednica Skupštine i Izvršnog odbora Komore, stara se o dostavljanju poziva za sjednice i korespondenciji u administrativnim poslovima Komore.

Svoju funkciju generalni sekretar obavlja profesionalno.

9) KOMISIJE KOMORE

Član 56.

U Komori se formiraju slijedeće Komisije:

1. Komisija za registar članova i izdavanje, obnavljanje i oduzimanje odobrenja za samostalan rad/licence,

2. Komisija za praćenje pravila/kodeksa medicinske etike i deontologije i pružanje zaštite građanima,
3. Komisija za edukaciju,
4. Komisija za kolegijalnu pomoć,
5. Komisija za privatnu praksu.

Član 57.

Komisije Komore čine predsjednik, zamjenik predsjednika i tri (3) člana.

Izuzetno od stava 1. ovog člana, Komisiju za registar članova i izdavanje, obnavljanje i oduzimanje odobrenja za samostalan rad/licence i Komisiju za privatnu praksu čine predsjednik, zamjenik predsjednika, dva (2) člana i dva (2) zamjenika člana.

Rad Komisije za registar članova i izdavanje, obnavljanje i oduzimanje odobrenja za samostalan rad/licence i Komisije za privatnu praksu odvija se u vijeću od tri (3) člana. Vijeće ima kvorum kada su prisutna dva (2) člana.

Izuzetno od stava 1. ovog člana, Komisiju za edukaciju čine predsjednik, zamjenik predsjednika i pet (5) članova.

Član 58.

Članove Komisija predlažu stručni kolegij ili povjerenici po općinama, u javnim zdravstvenim ustanovama i povjerenik za PZU, u privatnim zdravstvenim ustanovama, o čemu Odluku donosi Izvršni odbor.

Predloženi članovi obavezno potpisuju izjave da prihvataju dužnost člana Komisije Komore. Mandat članova Komisija traje četiri (4) godine s mogućnošću ponovnog izbora.

Član 59.

Komisije donose odluke većinom glasova ukupnog broja članova Komisije, ako ovim Statutom ili drugim općim aktima Komore nije propisana drugačija kvalificirana većina.

Rad Komisija odvija se u skladu sa odredbama Poslovnika o radu Komisija Komore.

1. KOMISIJA ZA REGISTAR ČLANOVA I IZDAVANJE, OBNAVLJANJE I ODUZIMANJE ODOBRENJA ZA SAMOSTALAN RAD – LICENCE

Član 60.

Komisija za registar članova i izdavanje, obnavljanje i oduzimanje odobrenja za samostalan rad/licence obavlja slijedeće poslove:

2. Prima pismene zahtjeve za članstvo i prestanak članstva u Komori,
3. Vodi Registar članova Komore,
4. Donosi odluku o upisu u registar članova Komore i izdavanju odobrenja za samostalan rad/licence ljekarima – članovima Komore ili odluku kojom se zahtjev odbija,
5. Donosi odluku o obnavljanju odobrenja za samostalan rad/licence ljekarima – članovima Komore ili odluku kojom se zahtjev odbija,
6. Donosi odluku o oduzimanju odobrenja za samostalan rad/licence ljekarima – članovima Komore,
7. Prima žalbe i primjedbe,
8. Obavlja i druge poslove utvrđene ovim Statutom i drugim općim aktima Komore.

9. Komisija je dužna u svom radu postupati u skladu sa odredbama Pravilnika o licenciranju, Pravilnika o registru, Pravilnika o stručnom usavršavanju ljekara i drugih općih akata Komore.

2. KOMISIJA ZA PRAĆENJE KODEKSA MEDICINSKE ETIKE I DEONTOLOGIJE I PRUŽANJE ZAŠTITE GRAĐANIMA

Član 61.

Komisija za praćenje Kodeksa medicinske etike i deontologije obavlja slijedeće poslove:

1. Prati i nadzire provođenje Kodeksa medicinske etike i deontologije,
2. Poduzima odgovarajuće mjere u slučaju kršenja pravila medicinske etike i deontologije,
3. Raspravlja i daje mišljenja o pojedinim pitanjima iz oblasti medicinske etike i deontologije,
4. Obavlja i druge poslove utvrđene ovim Statutom i drugim općim aktima Komore,
5. Pruža zaštitu građanima u ostvarivanju prava s obzirom na kvalitet, sadržaj i vrstu zdravstvene usluge koja im se pruža,
6. Prima žalbe i primjedbe građana,
7. Obavlja i druge poslove utvrđene ovim Statutom i drugim općim aktima Komore.
8. Komisija je dužna u svom radu postupati u skladu sa odredbama Kodeksa medicinske etike i deontologije, Pravilnika o odgovornosti članova Komore i drugih općih aktata Komore.

3. KOMISIJA ZA EDUKACIJU

Član 62.

Komisija za edukaciju obavlja slijedeće poslove:

1. Priprema prijedlog Plana edukacije članova,
2. Organizira u suradnji sa stručnim medicinskim društvima i medicinskim i stomatološkim fakultetom dodatno usavršavanje za proširenje djelatnosti unutar struke, s obzirom na nove dijagnostičko-terapijske metode te trajnu izobrazbu svojih članova,
3. Propisuje uslove stručnog usavršavanja ljekara koji obavljaju privatnu praksu, a zbog proširenja djelatnosti,
4. Obavlja i druge poslove utvrđene ovim Statutom i drugim općim aktima Komore.
5. Komisija je dužna u svom radu postupati u skladu sa odredbama Pravilnika o stručnom usavršavanju ljekara i drugih općih akata Komore.

4. KOMISIJA ZA KOLEGIJALNU POMOĆ

Član 63.

Komisija za kolegijalnu pomoć obavlja slijedeće poslove:

1. Pruža potrebnu pomoć svojim članovima u ostvarivanju materijalnih i drugih interesa, u skladu sa mogućnostima,

2. Koordinira odnose među članovima, te aktivno učestvuje u rješavanju eventualnih sporova,
3. Predlaže predsjedniku Komore angažovanje stručnog lica, kao branitelja, članu Komore u sporovima pred sudom, odnosno drugim organima,
4. Obavlja i druge poslove utvrđene ovim Statutom i drugim općim aktima Komore.

5. KOMISIJA ZA PRIVATNU PRAKSU

Član 64.

Komisija za privatnu praksu obavlja slijedeće poslove:

1. Brine o kvalitetu i radu privatne prakse,
2. Saraduje sa Federalnim i Kantonalnim Ministarstvom zdravlja po pitanju rješavanja problema s kojim se susreće privatna praksa, a koji su u skladu sa zakonskim propisima, ovim Statutom i drugim općim aktima Komore,
3. Predlaže način oglašavanja i način isticanja naziva privatne prakse,
4. Podnosi Izvještaj o radu Izvršnom odboru Komore,
5. Obavlja i druge poslove određene ovim Statutom i drugim općim aktima.

IX IMOVINA I FINANSIRANJE KOMORE

Član 65.

Komora ima svoj žiro-račun preko kojeg obavlja poslovanje.

Finansijsko i materijalno poslovanje Komora vodi u skladu sa odredbama Zakona i Pravilnika o finansijskom poslovanju Komore.

Komora ne raspolaže sredstvima za osnivanje i početak rada.

Osnivači Komore ne odgovaraju za obaveze Komore.

Član 66.

Izvori finansiranja Komore su:

- upisnine,
- članarine,
- naknade za usluge Komore,
- dotacije, donacije i zavještanja,
- prihodi od izdavanja publikacija,
- ostali prihodi.

Sve prihode, koje ostvari, Komora će isključivo koristiti za finansiranje djelatnosti i aktivnosti i iste ne može raspoređivati članovima Komore.

Član 67.

Višak prihoda nad rashodima Komora može oploditi na jedan od mogućih zakonskih načina.

Član 68.

Komora zaključuje ugovore i vrši druge pravne poslove i radnje u okviru djelatnosti koju obavlja.

U pravnom prometu sa trećim licima Komora odgovara imovinom kojom raspolaže.

X JAVNOST RADA

Član 69.

Rad Komore je javan.

Organi Komore su dužni da informišu članstvo o svim pitanjima o kojima se raspravlja ili donose određene odluke, i to putem biltena, publikacija i sl.

Samo izuzetno, u slučajevima predviđenim Zakonom, Komora može donijeti odluku kojom će utvrditi izuzetak od saopćavanja informacija.

XI NAGRADE I PRIZNANJA

Član 70.

Za postignute uspjehe u radu i savjesno izvršavanje zadataka, u znak priznanja i u cilju isticanja primjera, Komora može pohvaliti i nagraditi pojedine članove, organe i Komisije Komore.

Za ostvarenu suradnju sa Komorom i pomoć Komori Komora može pohvaliti i nagraditi pojedina udruženja, ustanove, organizacije i druga pravna i fizička lica.

Član 71.

Oblici pohvala i nagrada su:

- Javna pohvala,
- Priznanje,
- Plaketa i
- Novčana nagrada.

Odluku o dodjeli pohvala i nagrada donosi Skupština Komore.

Javne pohvale, priznanja i plakete dodjeljuju se u pismenom obliku koji utvrđuje Izvršni odbor Komore, kao i visinu novčane nagrade.

XII AKTI KOMORE

Član 72.

Akti Komore su:

- Statut Ljekarske komore Ze-do kantona;
- Kodeks medicinske etike i deontologije;
- Pravilnik o odgovornosti članova Komore;
- Poslovnik o radu Skupštine;
- Pravilnik o licenciranju;
- Pravilnik o vođenju registra članova Komore;
- Pravilnik o stručnom usavršavanju ljekara;
- Pravilnik o finansijskom poslovanju Komore;
- Poslovnik o radu Izvršnog odbora Komore;
- Poslovnik o radu Suda Komore;
- Poslovnik o radu Tužitelja Komore;

- Poslovnik o radu Nadzornog odbora;
- Poslovnik o radu Komisija Komore.

XIII PRELAZNE I ZAVRŠNE ODREDBE

Član 73.

Statut Komore je temeljni akt i s njim moraju biti usklađeni svi drugi akti Komore. Akte Komore donosi Izvršni odbor, osim akata navedenih u članu 25. Statuta Komore. Statut, Kodeks medicinske etike i deontologije, Pravilnik o odgovornosti članova Komore i Pravilnik o finansijskom poslovanju Komore usvaja Skupština Komore nadpolovičnom većinom (50% + 1) prisutnih delegata na sjednici Skupštine koja ima kvorum. Ostali akti za čije donošenje je nadležan Izvršni odbor usvajaju se u skladu sa Poslovnikom o radu Izvršnog odbora.

Član 74.

Prijedlog za izmjenu Statuta ili drugih akata može dati svaki član Komore.

Član 75.

Ostali akti utvrđeni ovim Statutom imaju se donijeti u roku od šest mjeseci od dana donošenja Statuta.

Član 76.

Prečišćeni tekst Statuta sadrži odredbe:

1. Statuta Ljekarske komore Ze-do kantona donesenog na Izvještajnoj skupštini od 13.10.2014. godine.
2. Odluku o izmjenama i dopunama Statuta sa sjednice Izorno-izvještajne Skupštine Ljekarske komore Ze-do kantona održane 20.10.2016. godine.

Statut stupa na snagu osmi dan od dana donošenja.

Ovaj Statut je objavljen na web stranici Ljekarske komore Ze-do kantona <http://www.ljkzedo.com.ba>

Predsjedavajuća Radnog predsjedništva

Zenica, 20.10.2016.godine
Broj: 01/S/2-557

Mersiha Mahmić-Kaknjo

Prečišćeni tekst Statuta verifikovan na
sjednici Izvršnog odbora od 31.10.2016. godine